

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

12 Janvier 2018

(24 Rabi'ul Aakhir 1439 AH)

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « *La Colère* ».

**La colère** - à ne pas confondre avec la colère divine ou la colère ki Allah faire apparaitre lors traits de So Messenger en signe de désapprobation (de mécontentement) de bane agissements de bane croyants et aussi de bane non-croyants - li ene facteur à travers quoi Shaytane amène bane dimounes à commettre bane péchés tels ki insulter les autres, casse bane relations, faire bane agressions physique, voire jusqu'à commette l'irréparable, c'est-à-dire, assassine dimounes. Ce qui fait ki nous bizin maitrise nous colère afin pou pas commette bane péchés aussi graves coumsa.

Allah dire à propos bane « *Muttaqi* », en d'autres mots, bane ki maitrise zot colère, dans Surah 3 (Al-Imran), Verset 135 : « [...] bane ki domine zot colère et pardonne à bane dimounes [...] ».

Donc, bane *Muttaqi* - bane à ki Allah pou accorde le paradis - zot bane ki maitrise zot colère, ki malgré zot la force et zot courage, pou capave arrive à pardonne à bane ki fine faire zot du tort.

Dans nous préserve nous colère, c'est ki nous pé préserve l'islam. La maîtrise de nous colère permette nous pou pratique l'islam de la meilleure manière. Aussi longtemps ki ene dimoune parvenir pou maîtrise so colère, so la foi pou préservée. Toutefois, si sa dimoune là laisse li emporter par la colère, sa pas pou apporte li nannié d'autre ki bane regrets. Sa dimoune là dans so regret pou dire: « *Ki faire mo fine dire (ou faire) ça?* ».

Fine rapporté par Abu Hurairah (ra) ki ene missié ti demande au prophète (saws): « *Donne moi ene conseil* ». Le prophète (saws) fine réponde li: « *Pas mette toi en colère* ». Sa dimoune là fine répète (sa question là) plusieurs fois, et le prophète (saws) fine réponde li: « *Pas mette toi en colère.* » (Bukhari).

Bane dimounes « forts » pas tappe les autres. Le prophète Muhammad (saws) fine dire: « *Ene dimoune fort c'est pas celui ki triompher lor (so) l'adversaire dans la guerre, mais c'est celui ki contrôle li-même kan li gagne ene gros colère.* » (Bukhari).

Le messenger d'Allah Hazrat Muhammad (saws) fine dire : « *Celui ki étouffe so colère alors ki li capave laisse so colère domine li, Allah pou appelle li au jour kot tous dimounes pou ré-lever (le Jour du Jugement) devant tous bane créatures et pou invite li pou choisir celui de bane Houris ki faire li plisse plaisir.* » (Abu Daoud).

Li important ki kan colère gagne le dessus lors nous, faudé pas nous laisse nous dominer à tel point ki nous faire l'injustice. Bien ki nous en colère, nous bizin toujours justes. Contrôle la colère li considéré comme ene grand action auprès d'Allah. Ce qui fait ki Allah fine réserve ene grand récompense pour sa action là.

Fine rapporté par Abu Darda (ra) ki li fine demande au Prophète (saws) : « *Ô Messenger d'Allah, indique-moi ene travail (ene action) ki pou fer moi rentre dans paradis?* ». Li (saws) fine dire : « *Pas mette toi en colère et (en retour) to pou gagne le paradis.* ». (At-Tabarani).

**Couma eski nous capave contrôle nous colère ?** Kan ene dimoune li en colère, li bizin appéze so colère par bane moyens suivants:

1. Li bizin cherche la protection d'Allah contre Shaytane en disant : « *Aouzou billahi minash shaytwaanir rajim* ».
2. Li bizin reste tranquille.
3. Si li deboute, li bizin assisé, ou sois alle allonger.

Le prophète (saws) fine faire compran ki si ene dimoune en colère dire : « *Mo cherche refuge auprès d'Allah contre Shaytane* », so colère pou apaiser. (Bukhari, Muslim).

Le prophète (saws) fine dire: « *Kan ene d'entre zot en colère et si li pé deboute, alors li bizin assizé; si colère là pas quitte li, alors ki li alle allonger.* » (Abu Daoud). Le prophète (saws) fine dire: « *Kan ene d'entre zot en colère, ki li reste tranquille!* » (Ahmad).

#### 4. Li bizin faire *Wuzu* pour calmer so colère.

En vérité ena ene hadith ki enseigne nous enseigne pou faire *Wuzu* pour calmer nous colère. Hadith là indiqué ki Rassoolullah (saws) fine dire : « *Certes la colère vine de Shaytane, et shaytane fine créer avec difé, et difé li teigne avec de l'eau; donc, kan ene d'entre zot en colère, ki li alle faire Wuzu!* » (Abu Daoud, Ahmad).

Donc, tous sa bane Hadiths ki mo fine cité lor le sujet de la colère li très important parski ene Musulman li appelé à contrôle so colère en toute circonstances. Parfois, par faiblesse kikaine vine victime de la colère, mais si li contrôle li à temps et cherche refuge auprès d'Allah contre Satan le maudit, alors en vérité, Allah pou vine à so secours.

Astaire kan nous cause de la colère divine, c'est ene sujet tout à fait exceptionnel. Couma nous conner, Allah - Le Tout-Puissant - Li pas influencé en aucaine façon par Shaytane. Au contraire, c'est Shaytane ki gagne peur Allah. La colère divine li ene marque de grand punition pour sa dimoune ki attire la colère d'Allah lor li parski sa colère là capave ruine so la vie lor la terre et dans *Aakhérat*. Shaytane li-même li fine attire la colère divine lor li et li pou être puni éternellement dans le feu de l'enfer pour so acte de désobéissance envers Allah.

Si au temps d'ene Messenger, Allah faire manifester So colère à travers So élu comme ene menace de rétribution sévère pour la personne concernée, alors sa dimoune là bizin tout de suite cherche le pardon d'Allah et réforme li, parski la colère divine capave sans aucaine doute écraze ene dimoune ignorant (*Jahil*), infidèle (*Kafir*) ou hypocrite (*Munafiq*), et li capave aussi être ene signal fort et distinctif ki invite, ou force ene croyant sincère pou conforme li à bane préceptes divines. Si Allah vine en colère contre sa dimoune là, sa croyant là, c'est pour éloigne li du mauvais chemin et pou amène li pou réforme li-même afin ki li capave goûte à la Satisfaction d'Allah et So plaisir.

Ki Allah guide zot tous pour maitrise zot colère et pou sauvegarde zot contre So colère et contre celui de So Messenger Choisi, et ki zot vive zot la vie en conformité avec l'Islam en toute sincérité. *Insha-Allah, Ameen.*